

Fasnacht 2014



## Sujet: My Händy isch e Hit, ganz Amerika loost mit

Wältwyt isch dr Eerger gross,  
d Agänte vo Amerika sin los.  
Si loose - und das nit z gnabb -  
saufräch global alli Händy ab!  
Die Spyeen luure hinder digge Muure,  
mir dien die Kaibe aigendlig no duure.  
Mien die doch all dä Quatsch abloose,  
wo d Lyt via Händy in Aether bloose.  
Mir wurds vo däm Gschnääder schlächt.  
Verstosst das nit gege d Menscherächt?

In unsere Natel, „auf der Lauer“  
hetts vo de Amis Wanze.  
Lueget nur die Wanzen a,  
wie die Wanze loose ka.  
In unsere Natel, „auf der Lauer“  
hetts vo de Amis Wanze.

Allewyl wenn ich s Ohr am Händy ha,  
Sag ich: Good Morning Mister Obama,  
“Do you höör me, lutt and clear?”  
Yes you scan, und ich weiss, you are here”.  
D Frau Merkel findets e grosse Skandal,  
unter Frind isch doch das nit normal!  
Unseren Ueli isch do uss anderem Holz,  
und wäge däm Abloose au ebitz Stolz.  
Jetzt wisse au d Ami,- är macht e Wett,  
dass är die Bescht Armee vo Alle hett.

In unsere Natel, „auf der Lauer“  
hetts vo de Amis Wanze.  
Lueget nur die Wanzen a,  
wie die Wanze loose ka.  
In unsere Natel, „auf der Lauer“  
hetts vo de Amis Wanze.

Au anderi Bundesreet wärde uss-spyoniert,  
d Frau Widmer-Strumpf isch oordeli irritiert.  
Si kämpft an alle Fronte fir unseri Bangge,  
doch die Bangge dien ihr das nit dangge.  
Dien ihri lusche Styyrgschäft munter wyter driibe  
und mir mien wieder hälfe die hohe Buesse z ryybe.

Nit numme Bundesbärn wird vo de Ami kontrolliert,  
die loosen au zue was in Basel am Rhy bassiert.  
E Grossreetli hett welle dr Root no Dubai verloh  
und als Abschied uff dr Brugg d Hoosen abegloh.  
D Draagig vom Ganze isch laider esoo,  
dä Grossrootsgloon isch allewyl no do.  
D Ami hänn haissi Ohre griegt bim Loose,  
wos dr Regierigsroot Conti hett verboose.  
Dä Conti hett in sine Konti e Buff  
und git drum si Regierigsboschten uff.  
None gresser Buff hett dr Wessels Hampe,  
däm dien si bees uff de Fiess ummedrampe.  
Bi dr BVB rumplets wiescht in dr Verwaltig,  
au d Kritik an dr Innestadtsperrig isch gwaltig.  
Dr Baschi Dürr duet, so heert me saage,  
d Verbrächer im aige Huus jetzt jaage.  
Vom Brutschin gseht und heert me nyt,  
eb dä gstohlen isch? Oder ebs en no git?

In unsere Natel, „auf der Lauer“  
hetts vo de Amis Wanze.  
Lueget nur die Wanzen a,  
wie die Wanze loose ka.  
In unsere Natel, „auf der Lauer“  
hetts vo de Amis Wanze.

Looset ihr Spyeen, im färne Ami-Land,  
dr Looser an dr Wand, gheert si aige Schand.  
Wird is die Ablooserei aber doch no z dumm,  
stiige mir halt wieder uff Briefduuben um.  
Mir Rhywälle lehn fir drey Daag s Natel sy  
und gniesse zämme d Fasnacht do am Rhy.